

**Og tagna' Sulat ni  
Jan  
Og Piuna Talu' pa'ali sog  
tagna' Sulat ni Jan**

Si Jan, ion sala kotow sog sopulu' bu dua' sosugu'onanan ni Isukristu nog dinondag non mogustal pa'ali dianon. Ngon tolu buk sulat ni Jan nog pinoit non sog poktanudanan dia ni Isukristu. Mogulang na ion og kosulat non nog tolu buk sulatanan non koni.

Og tigana' sulat non koni, pinoit non dia sog glam nog gotowanan kitu' nog tinumud na dia ni Isukristu sog ainain nog bonuaanan. Sog tang koyon, modakol og gotowanan mikpanad nog di' motud. Og duma, mikpoktalu' ilan nog og Bata' dow nog Mikpongon onda' solug nog glawas nog kilawan, otawaka onda' dow bota'oy nog sanyaotow, suga'id non, tinumona' dow tibua ion dini sog glupa'an.

Dadi, pilogdong ni Jan bianan sog sulat non koni dia sog ain mingandol na dia ni Isukristu, nog si Isus, ion og tantu Bata' nog Mikpongon, bu ion og tantu gotow dosop. Bu pidonsama' non dosop tumalu' sog ain og mikokunut na dia ni Isus nog mogolig ilan tokodoy nog pikpanad nog duma gotowanan koyon nog di' dumalan sog pikpanad nog miktidu dia ni Isukristu. Bu ondi' ilan tokodoy tumud nog pikpanad nog gotowanan koyon nog di' motud.

Sog sulat koni, mitampal dosop nog ain sinu-malig na dia ni Isukristu, molalam dia sog Gama' nog Ion og Mikpongon, bu molalam dosop dia sog pakasiotow non.

1. Og bokna nog sulat koni, 1:1-4.
2. Og dolag bu og kodoloman, 1:5-2:29.
3. Og gombata'anan nog Mikpongon bu og gombata'anan ni Kindagow, 3:1-24.
4. Og motud bu og glopangan, 4:1-6.
5. Og polosuku'an nog ain molalam, 4:7-21.
6. Og kopomondag nog bianan sog kopongan-dol, 5:1-21.

*Og Talu' nog pitongow nog Mikpongon dianita*

<sup>1</sup> Sinumulat ami daniu pa'ali sog Talu' nog piktiduan nog kotubu' nog donsama' na miongon tidu pa sog tolipunan. Og Talu' koyon nog pogolongon nami, ion non ion og midongog nog dili tolinga nami, bu mitongow nog dili mata nami, bu mituyok nog dili komot nami, bu kitima'anan nami. <sup>2</sup> Bu og piktiduan nog kotubu' koni, linogdoy non og ginungod, bu mitongow nami ion. Dadi, tinoksi'an nami ion daniu, nog ion og mogbogoy nog kotubu' nog da' kopus non. Sog donsama' pa, dia na ion sog Gama' ta nog Mikpongon, bu pitongow na dianami. <sup>3</sup> Sa'an itu' pikpulongag nami daniu pa'ali sog mitongow nami, bu midongog nami kitu', bagun amu mokopoksolabuk dianami, bu og kopoksolabuk ta koni bianan dia sog kosolabuk ta dia sog Gama' ta nog Mikpongon, bu dia sog Bata' non nog si Isukristu. <sup>4</sup> Sinumulat ami ini daniu bagun da motoktub og da'da'an ta.

*Og glangka nog gotow, ain sinumolabuk nadia  
sog Mikpongon*

<sup>5</sup> Og gustalan nog midongog nami dia ni Isukristu, ion non ini og pokpolotason nami koni daniu nog, og Mikpongon, dianon og dolag. Da'idun nododa' og dolom dianon. <sup>6</sup> Dadi, bila moktalu' ita nog sinumolabuk ita na dia sog Mikpongon nog saka, og poginangon ta og kohinangan da dia sog kodoloman, og ma'ana non, migloput ita bu da' ta longkaoy og motud. <sup>7</sup> Tibua, bila og poginangon ta og kohinangan nog dia sog kodolagan mama' non, nog ion dia sog dolag, mokopoksolabuk ita nog dumaanan ta bu kiugasan na og glam nog dusaanan ta nog dugu' ni Isus nog miglayas sog kudus, nog ion og Bata' nog Mikpongon.

<sup>8</sup> Bu bila moktalu' ita nog da'idun dusa ta, piglimbungan ta og dili glawas ta, bu da' ta tolima'oy og motud. <sup>9</sup> Tibua, bila moglila' ita nog dusaanan ta dia sog Mikpongon, ompunan non ita sog glam nog dusaanan ta kitu' po' ion kopongondolan bu di' mogbigya', bu ugasan non og glam nog kohinangan ta kitu' nog molaton. <sup>10</sup> Tibua, bila moktalu' ita nog da' ita pokodusa, og ma'ana non pingingloput ta og Mikpongon, bu da' ta pa tolima'oy og talu' non.

## 2

*Si Isus og mingingolot dianita*

<sup>1</sup> Amu, og gombata'anan ku nog kololaman ku, sinulat u ini daniu bagun amu bosia ondi' na mokinang nog dusa. Tibua, bila ngon

og mokopoginang nog dusa, ngon sala kotow og mingingolot dianon dia sog Gama' ta nog Mikpongon. Bu og mongingolot koyon, ion non ion si Isukristu, nog ion og midulus. <sup>2</sup> Ion miimung pomalas. Og ma'ana non, bianan dia sog kopalas kitu' dianon, kiugasan dun og glam nog dusaanan ta. Bu kona' tibua og dusaanan ta, suga'id non, asta dosop og dusaanan nog glam nog gotow.

<sup>3</sup> Bila mikokunut ita sog dondagananan nog Mikpongon, motintu dianita nog sunan ta ion. <sup>4</sup> Bila ngon gotow nog moktalu' nog kosunan non og Mikpongon, saka onda' non unutoy og dondagananan non kitu', og gotow koyon migloput bu onda' non tolima'oy og motud nog miktidu sog Mikpongon. <sup>5</sup> Tibua, simasima og mikokunut dia sog talu' nog Mikpongon, og glolaman nog gotow koyon sog Mikpongon mituman na. Og gindanan nog sinumolabuk ita na dia sog Mikpongon ma' nini. <sup>6</sup> Ain og miktalu' nog sinumolabuk na dia sog Mikpongon, sumboy moglogiling dia sog polomotadon ni Isukristu.

### *Og dondagan nog Mikpongon*

<sup>7</sup> Glokoleanan ku nog kololaman ku, og dondagan koni nog sinulat u daniu kona' amu na og sobu' dun. Bu kisunan niu na ini tidu pa sog tolipunan. Po' donsama' niu na midongog bianan sog gustalan kitu' daniu. <sup>8</sup> Tibua, minsan si'oy donsama' niu na midongog og dondagan koni, mama' da nog bogu pa daniu po' og kotud nog dondagan koni, motongow dia ni Kristu bu motongow dosop daniu. Po' og dolom

maya'maya' na mawa' bu og tantu nog dolag sinumilow na.

<sup>9</sup> Bila ngon gotow nog moktalu' nog ion dia na sog kodolagan, saka pokongitan non pa og gilug non sog tanud, og gotow koyon dia pa sog kodoloman. <sup>10</sup> Tibua, og gotow nog mololat dia sog pigilugan non, kobon non dia ion sog kodolagan. Bu di' ion kotongowan nog boya'an mokodusa ion. <sup>11</sup> Bigya' non, ain og gotow kitu' nog mangit pa sog gilug non sog tanud, dia pa ion migliu'liu' sog kodoloman. Bu og poginangon non, og kohinangan pa nog kodoloman. Di' non sunan ain ion posungu' po' miimung nog ondi' na ion mokotongow kobal nog modolom.

<sup>12</sup> Sinulat u ini daniu, amu og gombata'anan ku sog tanud, po' og dusaanan niu kiompunan na bianan sog ngalan ni Kristu.

<sup>13</sup> Sinulat u ini daniu, amu og mokogulangan sog tanud, po' kisunan niu na ion, ion donsama' na tidu pa sog tolipunan.

Sinulat u dosop ini daniu, amu og boguotowanan pa, po' dinag niu na si Kindagow.

Sinulat u ini daniu, amu og gombata'anan ku, po' kisunan niu na og Gama' ta nog Mikpongon.

<sup>14</sup> Sinulat u ini daniu, amu og mokogulangan sog tanud, po' kisunan niu na ion, ion donsama' na tidu pa sog tolipunan.

Sinulat u ini daniu, amu og boguotowanan pa, po' ompagon amu na dia sog Mikpongon. Bu og talu' non miungod na daniu. Bu dinag niu na Kindagow.

<sup>15</sup> Na' amu mima nog dinunya otawaka og gininisan nog dini sog dunya. Po' bila og gotow

mima nion, og ma'ana non, onda' ion kolalam nog Gama' ta nog Mikpongon. <sup>16</sup> Po' og glam nog dinunya, ion non ion og mokodusa kitu' nog glegan nog ginungod, bu ain motongow non kitu' nog ilakad gimaan non dun, bu og mogbonsag nog gakod non. Og glam nog kohinangan koni, onda' poktidu sog Gama' ta nog Mikpongon, suga'id non, dini da miktidu sog dunya koni. <sup>17</sup> Og dinunya bu og glam nog gimaan nog gotowanan nog dinunya, solianlian da. Tibua, og gotow nog mikokunut sog glegan nog Mikpongon, motubu' ion asta sog da' kopus non.

### *Og minanta dia ni Isukristu*

<sup>18</sup> Gombata'anan ku, dali' na og bungkas. Dadi, og midongog niu kitu' nog ngon posungu' matong og mongantu dia ni Kristu, minsan numun koni modakol na og minatong nog polongantu dia ni Kristu. Dadi, sa'an itu' kosunan ta nog dali' nododa' og bungkas. <sup>19</sup> Og gotowanan koyon, kona' ta nododa' ilan og sakup. Sa'an minawa' ilan dianita. Po' somo' sakup ta da ilan, onda' ilan bosia pokulog dianita. Tibua, sa'an ion minawa' ilan po' ma'ana non, kona' ta ilan sakup.

<sup>20</sup> Tibua amu, kosunan niu nog binogayan amu nog Bolakat nog Mikpongon tidu dia ni Kristu. Dadi glam niu, mokosun amu na nog motud. <sup>21</sup> Dadi akon, sa'an sinumulat u dianiu, kona' po' sabap nog ondi' niu kosunan og motud, suga'id non, sabap sog kosunan niu na, bu sabap dosop nog da'idun og gloput nog moktidu sog motud.

<sup>22</sup> Sima ma buan og moloput? Og moloput koyon, ain og ondi' tumud nog si Isus, nog ion og Kristu.\* Dadi, ain og ondi' tumud, ion non ion og mongantu dia ni Kristu, bu da' non tolima'oy og Gama' ta nog Mikpongon bu og Bata' non nog si Isus. <sup>23</sup> Po' simasima ompok tumolima' dia sog Bata', og ma'ana non, onda' non dosop tolima'oy og Gama'. Tibua, simasima og tinumolima' dia sog Bata', og ma'ana non, tinolima' non dosop og Gama' ta nog Mikpongon.

<sup>24</sup> Dadi, sumboy ungodon niu sog pikilan niu og midongog niu kitu' nog gustalan nog tidu pa sog kotabuk niu dia ni Isukristu. Po' bila inungod niu na itu', dia amu na kobon non sog Mikpongon bu dia sog Bata' non. <sup>25</sup> Bu motabuk ta og pinasad ni Kristu kitu' dianita nog kotubu' nog da' kopus non.

<sup>26</sup> Sinulat u ini daniu pa'ali dia sog polopanadanan kitu' nog di' motud po' bagun nilan da amu ondi' moit. <sup>27</sup> Tibua si Kristu, binogoy non na daniu og Bolakat nog Mikpongon nog kobon non mognong ion daniu. Dadi, minsan da'idun si'oy lumual og mokpanad daniu, og Bolakat non na og mokpanad pa'ali sog glam nog motud. Po' og pikpanad non koyon motud. Kona' og gloput. Dadi, pokokunut amu dia sog pikpanad nog Bolakat nog Mikpongon koyon daniu. Bu kobon non singkot amu dia ni Kristu.

<sup>28</sup> Dadi gombata'anan ku, kobon non singkot amu dianon po' bagun bila matong na ion, ondi'

---

\* **2:22** 2:22 Somo' ita da, si Isus, ion og tantu Diwata.

ita mondok bu ondi' ita mosipog dianon. <sup>29</sup> Dadi, kisunan niu noma nog si Kristu midulus, sumboy kosunan niu dosop nog ain og moginang nog kodulusan, og bata' dosop ion nog Mikpongon.

### 3

#### *Og gombata'anan nog Mikpongon*

<sup>1</sup> Kosunan ta nog landu' og glolaman nog Mikpongon dianita, po' tontong niu polo'ma, iningolanan non tanan ita nog gombata'anan non! Bu gombata'anan non doda' ita! Tibua, og gotowanan nog da' pokokunut sog Mikpongon, onda' nilan ita kilolaoy po' onda' nilan dosop kilolaoy og Mikpongon. <sup>2</sup> Glokoleanan ku nog kololaman ku, numun koni og gombata'anan ita na doda' nog Mikpongon. Tibua, onda' pa si'oy potompaloy dianita bog olo bayu'bayu' nog poktimoluyan ta sog gunanunan koyon, kosunan ta da, nog bila tumua' na ion, mimung ita na mama' non, po' motongow ta na ion bog olo bayu'bayu' non. <sup>3</sup> Dadi, simasima migdodama nog ma' nitu', polonu'on non og pikilan non bu og polomotadon non bagun ion mimung mama' ni Isukristu nog molonu'.

<sup>4</sup> Ain og gotow nog moginang nog dusa, og ma'ana non, sinoksug non og botad nog miktidu dia sog Mikpongon. Po' og ginang koyon nog da' kunut dia sog botad, ion non ion og dusa. <sup>5</sup> Kisunan niu nog sa'an si Kristu minangoy dini, po' bagun non mawa' og dusaanan ta. Po' ion, da' og dusa non. <sup>6</sup> Dadi, ain og sinumolabuk na dia ni Kristu, di' na ion tumibaba' moginang



nog dusa. Tibua, ain og gotow nog kobon non moginang da nog dusa, og ma'ana non, onda' non pa kilolaoy si Kristu, bu ondi' non pa ion kosunan.

<sup>7</sup> Gombata'anan ku, na' amu moleg kobigyakan nog minsan sima otowoy. Po' ain og moginang nog kodulusan, modulus ion mama' ni Kristu. <sup>8</sup> Tibua, ain og moginang kobon non nog dusa, og sakup ion ni Kindagow. Po' si Kindagow, tidu pa sog tolipunan, mikodusa na. Sa'an og Bata' nog Mikpongon minangoy dini po' inangoy non lo'atoy og ginang ni Kindagow. <sup>9</sup> Simasima binata' nog Mikpongon, ondi' na tumibaba' moginang nog dusa po' dianon na og kotubu' nog miktidu sog Mikpongon. Bu sabap sog binata' na ion nog Mikpongon, mologon nododa' nog tumibaba' ion moginang nog dusa. <sup>10</sup> Og gindanan bog olo og piktingkaan nog gombata'anan nog Mikpongon bu og gombata'anan ni Kindagow ma' nini. Ain og ondi' moginang nog kodulusan otawaka ondi' mololat sog pakasiotow non, kona' og gombata' nog Mikpongon.

### *Moglinolatoy ita*

<sup>11</sup> Koni og pomali nog midongog niu tidu pa sog tolipunan, nog sumboy moglinolatoy ita. <sup>12</sup> Na' amu moglogiling dia ni Kain. Po' ion og sakup ni Kindagow. Bu binunu' non og kongudan non. Iduma gidoy buan binunu' non ma? Sa'an itu' binunu' non, po' og kongudan non kitu', midulus og kohinangan non saka ion, molaton og kohinangan non. <sup>13</sup> Dadi pigilugan ku, na' amu mosobu' dun bila pokongitan amu nog

gotowanan dini sog dunya. <sup>14</sup> Po' kisunan ta nog mikawa' ita na tidu sog patoy bu minangoy ita na sog kotubu' nog da' kopus non. Sa'an kisunan ta po' sabap sog milolat ita sog pigilugan ta. Po' simasima ondi' mololat, og ma'ana non, og gotow koyon dia pa ion sog patoy. <sup>15</sup> Bu ain og gotow nog mangit sog gilug non, mama' da nog binunu' non na. Bu kosunan niu nog og polomunu', da'idun og kotubu' non nog da' kopus non.

<sup>16</sup> Dadi, ma' nini og kosabut niu dun bog olo doda' og glolat, si Isukristu, inatas non matoy sabap sog glolatan non dianita. Dadi ita si'oy, sumboy bosia mongatas ita dosop sumoliu dia sog pigilugan ta minsan sog kopotayan. <sup>17</sup> Bila ngon sala kotow dianita nog ngon ngon da bosia dianon, saka mitongow non og gilug non nog kilogonan, saka ondi' non ion tobangan, ondi' buan og motud nog dianon og glolat nog Mikpongon. <sup>18</sup> Dadi gombata'anan ku, sumboy kona' tibua sagya moktalu' ita nog mololat ita. Suga'id non, og tantu mololat sumboy motongow bianan dia sog kohinangan ta. <sup>19</sup> Dadi, ma' nitu' og kisunoy ta dun nog ita, dia ita na doda' sog motud, bu bianan ditu' mimung nog motikna' og pikilan ta dia sog sungu'an nog Mikpongon. <sup>20</sup> Minsan si'oy mogdialominawa ita nog ukumon ita sabap sog mikodusa ita, og glolat nog Mikpongon labi pa sog pikilan ta kitu'. Bu ion, kosunan non og glam non.

<sup>21</sup> Dadi glokoleanan ku nog kololaman ku, bila onda'idun na og dialominawa ta nog ma' nitu', ondi' ita na modapa' mongadap sog Mikpongon.

<sup>22</sup> Bu motabuk ta ain pongonion ta dianon po'

mikokunut ita dia sog dondagananan non. Bu inang ta og sosuku nog kosu'atan ion dun. <sup>23</sup> Bu og dondagan non ma' nini. Sumboy tumud ita dia sog ngalan nog Bata' non nog si Isukristu. Bu sumboy moglinolatoy ita mama' nog dinondag non kitu' donsama' dianita. <sup>24</sup> Simasima og mokokunut sog dondagananan nog Mikpongon, og ma'ana non, kobon non dia ion sog Mikpongon, bu og Mikpongon kobon non dianon. Sa'an kosunan ta nog og Mikpongon dia na nita, sabap sog Bolakat non nog binogoy non dianita.

## 4

### *Sumboy pokilailaon ta og poktiduan nog bolakat*

<sup>1</sup> Glokoleanan ku nog kololaman ku, na' amu mogdodali' tumud sog gotowanan koyon nog moktalu' ilan nog ngon og bolakat nilan nog miktidu dia sog Mikpongon. Suga'id non, pokilaila niu pa poguna bog dia ta' doda' miktidu sog Mikpongon. Po' modakol og polopanadanan nog momali ilan nog di' motud nog mikponua' dini sog dunya koni. <sup>2</sup> Bu og gindanan niu dun nog og bolakat koyon nog miktidu dia sog Mikpongon, ma' nini. Simasima og gotow nog mokpanad nog si Isukristu miktimaluy gotow, ion non ion og gindanan niu dun nog, og bolakat non koyon ion non nion og miktidu sog Mikpongon. <sup>3</sup> Tibua, ain ondi' ma' nitu' og gustalan non dun nog si Isus miktimaluy gotow, og pikpanad non koyon, ion non ion og gindanan nog og bolakat non kitu' da' dia miktidu sog Mikpongon. Suga'id

non, og bolakat koyon nog dion non, miktidu ion dia sog minanta kitu' dia ni Kristu. Ion non ion og midongog niu kitu' nog posungu' pa matong saka, numun koni dini na.

<sup>4</sup> Tibua amu, og gombata'anan ku, og sakup amu na nog Mikpongon. Sa'an dinag na dianiug og polopanadanan koyon nog di' motud, po' og Bolakat nog Mikpongon og migonong dianiug. Bu og kopogbaya' non labi pa dia sog kopogbaya' nog bolakat nilan koyon dini sog dunya. <sup>5</sup> Og polopanadanan koyon nog di' motud, sakup ilan nog dunya. Sa'an itu' og pogustalon nilan ain da og dini sog dunya. Bu og gotowanan dini sog dunya koni, mokinongog dianilan. <sup>6</sup> Tibua ita, og sakup ita na nog Mikpongon. Dadi, ain og kisunan non na og Mikpongon, mokinongog ion dianita. Tibua, ain og kona' sakup nog Mikpongon, ondi' ion mokinongog dianita. Dadi, ma' nitu' og kiindanoy ta dun og bolakat koyon nog motud bu og bolakat koyon nog di' motud.

### *Og glolat dia kotongow sog Mikpongon*

<sup>7</sup> Glokoleanan ku nog kololaman ku, sumboy kobon non moglinolatoy ita. Po' og Mikpongon, ion og poktiduan nog glolat. Og gotow nog milolat sog pakasiotow non, ion binata' nog Mikpongon bu kosunan non na og Mikpongon. <sup>8</sup> Simasima ondi' mololat, di' non kosunan og Mikpongon. Po' og Mikpongon og poktiduan nog glolat. <sup>9</sup> Og kopokpotongow nog Mikpongon nog glolaman non dianita ma' nini. Dinondag non og Bata' non nog boktung mangoy dini sog dunya bagun ita kongonan nog kotubu' nog da' kopus

non bianan dianon. <sup>10</sup> Og glolat kitu' nog pogo-longon ku, kona' og glolaman ta sog Mikpongon, suga'id non, og glolaman nog Mikpongon dianita nog boya'an lamig non tanan binogoy og Bata' non mimung nog pomalas bagun ita kompunan sog dusaanan ta.

<sup>11</sup> Glokoleanan ku nog kololaman ku, bila ma' nitu' ma og glolaman nog Mikpongon dianita, ita si'oy, sumboy moglinolatoy ita. <sup>12</sup> Po' da'idun og gotow nog mikotongow nog Mikpongon. Tibua, bila moglinolatoy ita, og Mikpongon kobon non mogonong dianita. Dadi bila ma' nitu', og glolaman nog Mikpongon, mituman na dianita.

<sup>13</sup> Kisunan ta nog dia ita na sog Mikpongon bu ion si'oy dia na nita po' sabap sog Bolakat non nog binogoy non dianita. <sup>14</sup> Bu ami, mitongow nami ion bu pigustal nami sog gotowanan nog, og Gama' ta nog Mikpongon, dinondag non og Bata' non mangoy dini bagun ion mimung nog Polonabang nog gotowanan dini sog dunya. <sup>15</sup> Og gotow nog mogustal nog si Isus og Bata' nog Mikpongon, kobon non og Mikpongon mogonong dianon. Bu ion si'oy, kobon non dia dosop sog Mikpongon. <sup>16</sup> Dadi, sumalig ita dia sog glolaman nog Mikpongon po' kibianan ta na.

Og Mikpongon og poktiduan nog glolat. Dadi, simasima og pigboya'an nog glolat, ma'ana non, dia ion kobon non sog Mikpongon bu og Mikpongon si'oy kobon non mogonong dianon. <sup>17</sup> Dadi bila ma' nitu', dia noma nita og glolat, mituman na itu' dianita. Sa'an ondi' ita na mondok bila matong na og gondow kitu' nog ukumon og glam nog gotow. Po' minsan si'oy dini ita pa sog

dunya koni, piglogilingan ta da og polomotadon ni Kristu. <sup>18</sup> Bila dia ita sog glolat, ondi' ita mondok. Po' og glolat koyon nog mituman, og mokawa' nog gondok ta. Bila mondok ita, og ma'ana non, onda' pa kotuman og glolat kitu' dianita. Po' sa'an og gotow mondok po' og dodomaan non polihola'on ion.

<sup>19</sup> Sa'an mololat ita po' og Mikpongon milolat poguna dianita. <sup>20</sup> Bila ngon gotow moktalu' nog ion molalam sog Mikpongon saka mangit ion sog gilug non, og gotow koyon moloput. Po' bila ondi' ion mololat dia sog gilug non nog saka kobon non motongow non, olo ma og mogandun kolalam non dia sog Mikpongon nog saka ondi' non motongow? <sup>21</sup> Dadi, koni og dondagan nog binogoy non dianita, simasima og gotow nog molalam sog Mikpongon, sumboy molalam dosop dia sog gilug non.

## 5

### *Momondag ita bianan sog kopongandol*

<sup>1</sup> Simasima og tumud nog, si Isus og Kristu,\* binata' na ion nog Mikpongon. Bu simasima og molalam sog gama', molalam dosop ion sog bata' non. <sup>2</sup> Og gindanan nog mololat ita sog gombata'anan nog Mikpongon ma' nini. Molalam ita sog Mikpongon bu mokokunut ita dia sog dondagananan non. <sup>3</sup> Po' og glolaman ta dia sog Mikpongon motongow bianan sog kopokokunut ta dia sog dondagananan non. Bu og dondagananan non koyon ondi' mologon

---

\* **5:1** 5:1 Somo' ita da, si Isus, ion og tantu Diwata.

pogunuton. <sup>4</sup> Po' simasima binata' na nog Mikpongon mimondag na sog dinunya. Bu sa'an mikopondag ita po' bianan sog kopongandol ta. <sup>5</sup> Dadi, sima mobuan og mokopomondag sog dinunya? Og mokopondag sog dinunya, ain da og tinumud nog si Isus og dili Bata' nog Mikpongon.

*Og gininisan nog taksi' pa'ali sog kodiwata ni Isukristu*

<sup>6</sup> Si Isukristu koni, minangoy ion dini. Sa'an kisunan ta po' bianan sog kobunyag dianon sog tubig bu sog kopatoy non kitu' nog miglayas og dugu' non. Kona' tibua bianan sog tubig, suga'id non, bianan dosop sog dugu' non. Bu og Bolakat nog Mikpongon og mikotaksi' dia sog gotowanan pa'ali dianon, bu og koponaksi' nog Bolakat non koyon motud. Po' og Bolakat non koyon, og poktiduan nog motud. <sup>7</sup> Dadi, ngon tolu ginis og mokotaksi' pa'ali dianon, nog si Isus, ion non og Bata' nog Mikpongon. <sup>8</sup> Sa', bianan sog kotaksi' dianon nog Bolakat nog Mikpongon. Kodua', bianan sog kobunyag dianon sog tubig. Bu kotolu non, bianan sog dugu' non nog miglayas sog kudas. Og tolu ginis koni nog taksi' pa'ali dianon miksolabuk ilan. <sup>9</sup> Bila tudon ta og koponaksi' nog sagyaotow, labi ita na tud sog koponaksi' nog Mikpongon po' og koponaksi' nog Mikpongon motud nododa', bu tinoksi'an non pa'ali sog Bata' non. <sup>10</sup> Dadi, simasima og tumud nog si Isus og Bata' nog Mikpongon, kitoksi'an dianon pa'ali dia ni Isus. Tibua, ain og ondi' tumud sog Mikpongon, piloput non og Mikpongon po' da' ion tud sog koponaksi' non kitu' pa'ali sog Bata'

non. <sup>11</sup> Koni og taksi' kitu' nog pogolongon. Og Mikpongon, binogayan non ita nog kotubu' nog da' kopus non. Bu og kotubu' koyon nog da' kopus non, dia poktidu sog Bata' non. <sup>12</sup> Dadi, simasima sinumolabuk dia sog Bata' non, ngon og kotubu' non dia sog Mikpongon. Tibua, simasima og ondi' sumolabuk dia sog Bata' nog Mikpongon, onda'idun og kotubu' non dia sog Mikpongon.

*Og kotubu' nog da' kopus non*

<sup>13</sup> Sinulat u ini daniu, po' bagun ain tinumud na dia sog Bata' nog Mikpongon, motantu daniu nog binogayan amu na nog kotubu' kitu' nog da' kopus non. <sup>14</sup> Dadi, ondi' ita na modapa' mongadap sog Mikpongon. Po' kosunan ta nog bila mongoni ita dianon nog ain dumalan dia sog glegan non, bogoyon non dianita. <sup>15</sup> Bu bila kosunan ta na nog inongogan non og gyakin ta, kosunan ta dosop nog motabuk ta da og minsan olo pongonion ta dianon.

<sup>16</sup> Bila ngon og sala kotow, nog mitongow non og gilug non sog tanud moginang nog dusa nog ondi' da mogdoku'an sog patoy nog da' kopus non, og mikotongow koyon dun, sumboy pogyokinan non og gilug non koyon nog mitongow non moginang nog dusa po' umpianan da nog Mikpongon og kotubu' non kitu'. Og pogolongon ku koni, ain og gotowanan kitu' nog mikodusa nog ondi' mogdoku'an sog patoy nog da' kopus non. Po' ngon og gininisan nog dusa nog mogdoku'an sog patoy nog da' kopus non. Tibua, onda' u poktalunog pogyokinan niu



pa'ali sog dusa kitu' nog mogdoksu'an sog patoy nog da' kopus non. <sup>17</sup> Og glam nog kohinangan nog di' dumalan sog motud, og dusa da. Tibua, ngon da og dusa nog ondi' mogdoksu'an sog patoy nog da' kopus non.

<sup>18</sup> Kosunan ta nog ain binata' na nog Mikpongon, ondi' ilan na tumibaba' moginang nog dusa. Po' og Bata' nog Mikpongon og mogipat dianilan, bu si Kindagow ondi' na mokopongula'at dianilan. <sup>19</sup> Bu kosunan ta nog ita, og gombata'anan ita na nog Mikpongon. Bigya' non, og gotowanan nog misakup dini sog gliwag nog dunya koni, pigboya'an ilan ni Kindagow. <sup>20</sup> Kosunan ta dosop nog, og Bata' nog Mikpongon minatong na dini sog dunya bu binogoy na dianita og sabut bagun ta kosunan og motud nog Diwata. Bu sinumolabuk ita na dia sog motud nog Diwata, sog Bata' non nog si Isukristu. Ion og tantu Diwata, bu ion og poktiduan nog kotubu' kitu' nog da' kopus non.

<sup>21</sup> Dadi gombata'anan ku, pogolig amu nog glatdiwataanan otawaka monglodawan.

**Kitab Bogu Pasad talu' nog Mikpongon  
Subanon, Western: Kitab Bogu Pasad talu' nog  
Mikpongon New Testament**

copyright © 1996 Wycliffe Bible Translators, Inc.

Language: Subanon, Western

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 13 Jul 2024 from source files  
dated 29 Jan 2022

04701be4-22cc-51ef-baf5-706018256e87